

陶文毅公全集

陶文毅公全集卷三十九目錄

文集序

送秦少司寇歸無錫序

送周希甫太守赴南河工次序

送同年彭兩峰之官滇中序

送顧南雅侍讀督學雲南序

文集序

送秦少司寇歸無錫序

小岷秦公以古文名一時宦轍所至矯矯不諧於俗入爲少寇士大夫方以設施望公而公歛然動止足之思屢見

上求去至是復以疾自陳

上雖俞其請而猶

諭以復來然公之歸蓋將不復來也同志諸君念公之去無能以留則相率餞公於城南之陶然亭惟古之賢人其留足以增一時之重其去足以繫異日

之思吾讀白駒之詩一則曰以永今朝再則曰以永今夕且於其未去也曰繫之維之以冀其稍留於旣去也曰爾公爾侯以冀其復至夫人已脫屣軒冕繫維之不可得而欲以好爵縻之謂可以去而復來也勢必不能推詩人之意亦以留之無策而姑以抒其永朝永夕之懷而已方公之兩官浙江也人士惟恐其去其在廣東與吾湖南也亦然一時之別已去而猶望其來而今且解組老矣好爵之縻知不足爲公道慧山二泉之側草屋數間繚以竹木所謂伊人於焉逍遙陶然亭上將不復

有公之車跡焉於是相與繪圖賦詩以附於白駒  
之義而屬余弁其端蓋詩三百篇古皆有序俾覽  
者得以考見當日之情事如公者固不可以無紀  
也同集者爲李宗丞宗瀚趙給諫慎畛謝編修學  
崇階樹林編修培厚劉編修嗣綰賀編修長齡唐  
儀邵業謙庶常鑑家大令章鴻及余凡十一人

送周希甫太守赴南河工次序

海與河皆古運道禹貢冀州曰夾右碣石揚州曰沿于江海此海運也其他浮濟漯浮汶浮洛浮淮泗浮江沱潛漢皆達于河則河運也當日荒度之法不傳史臣第總其綱曰導自孟子釋之曰疏曰濬曰決曰排而導水之方始著夫禹之導水一而已而所以導者不同其排決之法多施之南條而北條則用疏與濬凡以各有宜也惟禹能審形勢察脈絡相水之宜而不強以制之所以爲明德也宋元以來言者紛紛不過壘隄而已築防而已而

疏濬則未之及此白圭之法非禹法也禹之治水所以去害而利卽因之其於運也可以海則海可以河則河不可以海不可以河則陸如逾洛逾沔是已後之言運者無所謂陸已而又一於河則廢海一於海則廢河此所以相持而不得其通也計國家仰東南漕以給

京師歲需四百餘萬石由大江入瓜口絕淮渡黃經運河以達通州爬灘駁淺日夜催趲僅而能至設一旦遇大災沴河且壅潰遏糧艘不行將

京師食奚出此其患豈止於河而已耶海運之法雖

怵於風濤然方遠王獻諸人所言由淮安而東歷  
麻灣海倉二口逕登萊以泊天津其間僅一千六  
百里耳地介河海之交未必非夾右碣石之遺而  
議者或猶以迂疏目之遂使官家數千百萬金錢  
歲填無底之河以苟旦夕之安而不可得嗟夫河  
以利漕也漕無息肩之地是河終無受治之時也  
夫河之遷徙無常要自有其不易者水之性利於  
下流不暢則逆逆必溢水之勢蓄於上力不併則  
弱弱必壅然則隄防雖密適以遏其流使怒耳閘  
壩雖多適以分其力使淤耳高家堰之危以洪澤



湖淤也洪澤湖之淤以黃河倒灌而入淮也黃河之倒灌以下河日積而日高也然則治河之策必自下河始下河之治必自疏濬始昔者

聖祖仁皇帝時嘗濬大通口矣

駕臨相視首

命拆攔黃壩疏海口以導河入海次閉六壩疏清口以導淮刷黃次疏淮揚裏河開人字芒稻涇澗等河而安瀾之慶遂巍然與神禹同功惜後之在事者狃目前惜小費舉一切撈爬挑滌之具奏罷之而海口復湮河事遂以日壞比者河決碭山徐邳鳳泗

之間頓成澤國

天子覽奏至爲流涕此誠臣子竭力効命之秋也而吾  
郡周希甫先生適奉

特旨赴工次蓋河事棘矣導水之方自有

延筭在先生之所職則工而已工不堅雖有神禹之  
指揮而亦無以收疏濬之效夫麻稽柳葦質易腐  
朽沙土疏浮隨築隨圯計莫若擇工之尤要者易  
之以石費雖倍而功不啻萬之昔人於白河之淤  
尙欲令運舟自擁兜杓四五具遇淺卽濬以爲省  
費之一策今若暫釋運舟每歲搭解京師之倉板

以載石其勞費差足相準而於冬月因駁船之暇  
游乎懷孟太行之石可順流而下也然此特河工  
之一節耳至於相機宜審形勢終恐非疏濬之不  
爲功也先生昔守黔之大定治行第一故於茲行  
有厚望焉

送同年彭兩峰之官滇中序

庚申之秋與澍同舉於鄉者四十五人明年春禮

部會試聯捷一人

方同照

又明年捷二人

澍與喻宣孝

又

三年捷二人

符鴻王泉之

又三年捷三人

蔣舒惠瞿家鰲譚鵬霄

凡四試捷八人惟澍以壬戌入史館餘皆得縣令

以去而議敘暨大挑爲縣爲學官者又廿餘人至

今歲而入闈僅得八人揭曉捷三人焉三人者名

皆在二甲前皆蒙

恩錄用計館選一

劉教五

學正一

蔡信芳

而彭君兩峰復得

縣令蓋本年榜中之以知縣卽用者名次自兩峰

始故事卽用皆部選自乙丑多至八十餘人部選  
無期當事建議分發因併及壬戌一科遂爲例引  
見後由部簽分各直省而兩峰獨得雲南雲南夫

京師萬里仕宦所不樂兩峰長沙人由長沙西南之  
滇與北至

京師等且得便存省其父母而豔鄉里以衣錦之榮  
然則人所不樂者兩峰得之則樂也抑今之憚爲  
令滇中者不特道里之遙而尤以銅運爲苦銅運  
由滇達川經長江之險凡七八千里迺入瓜口渡  
黃道運河以至

京師其間自陸而舟而車歷三四年始竣事令於滇  
者罕得免焉竊惟銅運

國家大計而以邊遠一縣令獨肩重任犂硯風濤之  
跋涉長年胥走之覬覦當之者鮮不竭蹶因而敗  
事者亦多矣計惟有遞運之法滇輸之楚楚輸之  
吳以次而魯而燕源源相接事不費而役不勞似  
亦經

國惠下之一道然而令之賢否不專繫此且亦不足  
爲精明強幹之吏難也昔人稱滇南風土清淑四  
時景物如春百姓安樂葉榆西洱之間無犬吠聲

易治之邦誠莫如滇爾峰在同年中最觥觥雅欲  
以功名見其不以爲苦而以爲樂也於其行爲序  
其樂以送之

送顧南雅侍讀督學雲南序

國家械樸作人首重科目懋簡使臣以司文柄於是  
乎有學臣有考官考官以科目攬人才者也學臣  
以人才奉科目者也二者皆膺

特命京朝之臣以爲榮寵然考官不過司去取於一時  
披覽而外無餘事而學臣則綜理內外綱紀始終  
有跋涉之勞有校閱之瘁有關防舉劾之責往返  
三年其任特重於考官蓋嘗論之士爲秀才時則  
子弟之職也及其入官則父兄之事也爲子弟時  
目不覩詩書之教耳不聞孝悌之言傾家蕩產顛



覆是虞一旦責以成人之事謂可以爲父爲兄而  
長養其子弟也勢必不能學臣之任猶是也去取  
無方教導無法則人材日詘異日任之以事而不  
勝處之以位而不稱甚者勢利癘於中苞苴潰於  
外怨毒之不卹刑戮之不威雖從而爲之制業已  
無及矣此生民之大命而有國之通患也明其爲  
患而學臣之任不獨重於考官也乃直先於督撫  
矣同年友顧子南雅立心制行以古人自期自其  
爲秀才時則已慨然有四方之志壬申春大考翰  
詹名在一等

天子嘉之由編修超擢侍讀其年六月

命督學雲南陞辭之日

天子雍容召見語以雲南雖邊徼其民惇且文一切培養之法宜立蓋

天子所以俟顧子者厚矣顧子亦可藉是以報特達之知而造士於雲南吾聞昆明有錢南園先生豐者嘗督學吾楚前後六年其去弊以嚴而待士則寬其法制有恒而立事必豫至今人猶思之厯數前後學臣無出其右者顧子之是邦其不患無所取法也  
翌歲有爲考官於雲南者方將憑軾以觀顧子之

教焉

陶文毅公全集卷四十目錄

文集書

與嚴樂園先生書

覆翁鳳西方伯書

覆黃花耘孝廉書

與王萬泉書

答高麗駙馬都尉豐山君洪顯周書

再答朝鮮權品山書

覆顧南雅侍讀書

與趙笛樓觀察書

覆王垣夫先生書

謝邑人公舉 先君子崇祀鄉賢書

覆秦小峴侍郎書

覆秦小峴侍郎書

與卓海帆侍御書

覆陸平泉師書

與百菊溪制府書

文集書

與嚴樂園先生書

記束髮時卽聞 先子稱說有淑浦嚴先生者倜儻磊落如古陳同甫一流迨辰苗滋事先生以諸生應撫軍姜公聘與幕府謀議親督鄉兵所在有功事平徵上公車膺

天子特簡名在

九重 先子暇則舉以示澍謂有志竟成自恨所處不得與共事因出篋中所藏古風一章蓋乾隆甲辰冬與先生自岳麓歸溯資江而上過小淹至寒舍

之所作也詩旨謂山川靈秀視乎其人豪傑之士  
必不以地自固今先生既功業炳然增輝梓里而  
先子雖屢躋場屋以諸生終然名山事業識者  
咸謂可傳然則先生與先子出處不同而志與  
道則同也今年邑侯李公纂輯縣志而先子遺  
槩舊爲人所攬並先生大作亦俱散失緬惟先生  
當日與先子船頭促膝唱咏情深一時風流佳  
話允足增光藝林乞飭侍史於大集中錄出原詩  
俾得刻入邑志亦不朽盛事也

覆翁鳳西方伯書

承示敝省通志凡例體大思精文簡事核以此接  
迹馬班上規筆削洵足啟筆路之荒而離湖湘之  
色矣欽佩欽佩湖南舊志始於陳桂林相國今觀  
其書舛漏不一而足似相國固未嘗寓目者卽如  
兩漢時楚湘人物本屬無幾惟蔣琬公忠體國人  
所共知蜀志已明載零陵湘鄉人而長沙府人物  
志內竟無其名漏略至此其他可知又如敝縣人  
數尤少明史有傳二篇一爲張騏一爲李禎俱載  
安化人未分別省分然山東通志名宦總部載騏



湖廣安化人至禎傳則有禎家洮河之語其爲甘肅之安化無疑而舊志顧遺驥而錄禎且於禎傳刪去家洮河一語志以傳信又何必如此遷就相借以爲重耶他如鄭崇儉一傳亦恐是山西之寧鄉而誤入者當更考之耳至於益陽劉侍郎憲之死於逆瑾羅侍郎喻義之黜於溫體仁湘潭李宗伯騰芳之厄於魏忠賢皆忠義皎皎在人耳目羅李傳在明史本末甚具劉雖附傳而益志特詳乃劉李僅寥寥數語羅則並姓名無之此豈文獻不足耶若明陳寧之名在姦臣行同酷吏而誤信楚

紀之言比諸汲黯則又採擇未精難以爲據矣凡此皆長沙一郡之事就對所知者言之恐別郡類此者正復不少也前承示綱羅放逸已得二三百人又徧徵之江浙藏書家則此數條當已在校正之列惟新增事跡勢不能不取材於縣府志而縣府志又未必悉善不皆可惡且非熟悉彼間掌故者其去取亦未必盡當也竊謂修志一事與史不同史善惡並書志則錄其善者而已故與其取之寬而或失之濫毋寧取之嚴而其後猶可增敝縣舊志修於康熙三十年以前先君子嘗手輯續

藥沒後爲修志者率行塗改全乖體製擬再爲刪  
擇以備采取遲容奉教其趙靈伯陳滄洲楊孟班  
陳可齋彭石壘王而農諸公傳謹以呈覽至羅方  
城九峰諸公尙未有秉筆者名宦諸公俟采訪得  
後當錄送不宣

覆黃花耘孝廉書

頃接手書知與虎癡同在志局湘東三管君家兄弟竟秉其二多少潛德幽光賴茲闡發此事重大既以爲幸又以爲悚也翁方伯前函言志書體例一切多係閣下之筆良工辛苦具見一班諒非從前孟浪者比所諭名宦諸公列傳卽當託人鈔錄但館例巡撫以上乃得立傳所鈔恐亦無多仍當於外間訪之大約衆口俱同卽可秉公載入亦不必盡以見諸簡策者爲憑據蓋續纂近事與往事不同往事必徵諸前人之記載近事必參諸輿人

之採訪據輿論而纂入省志卽他日統志與史彙  
之憑據也此時館中正在纂輯儒林文苑列傳湖  
湘自王夫之先生而外得入者寥寥弟雖極言之  
而亦未能多收正因無憑據之故是省志不可不  
早成送館以備采擇也至統志弟曾分任編輯其  
後經歷多手每有刪改茲將敝縣已載者另錄一  
分寄呈方伯處吾兄可就近取閱此後有當補載  
者容續寄至令祖昆仲與劉理堂前輩父子昆仲  
皆有政績聞於人口何不縷列一二事實趁統志  
尙未竣工當持示館史采入此亦爲子孫者所當

留意也

與王萬泉書

春前接讀手書按其歲月已經年矣關河迢遞消息難通契闊當何如耶伏惟先生舉比談經春風滿座且官居寶慶門前一條水直達百花臺下仕宦而有桑梓之榮儒官而有封君之業以視鄙人碌碌京塵相去何啻倍蓰自握別後六載於斯今春改官御史旋校禮闈闈中殫心竭力繼晷焚膏念各省舉子跋涉來都遠者萬里近者千里襁被春糧餐風飲露辛苦萬端始得入矮屋簷中俯首沈吟成此數藝而以房官輕於一擲不得邀堂上

人之一盼者何限靜言思之殊可矜惻故於分到之卷非經三數過不肯批抹計本房薦卷一百二十本爲文爲策共一千五百六十篇篇俱有評記冊其落卷備卷稱是自問此心差可無歉豈意人心不同遂有以薦卷太多勞其披閱而惡之者是以本房雖得士十二人佳卷之被擯者無數而僕亦自此病矣闌中有句云出戶忽驚新翠合滿階猶惜落花多蓋有慨乎其言之也此病出闌更熾臥牀者已三閱月日來始赴都察院視事江南道爲最繁之缺所司戶部銀庫關稅漕運倉儲皆經



國大計書生本業拙於筭筭稽查一切深虞隕越  
每望南雲輒有林泉之思暉若庶常散館本擬一  
等因詩題錯寫一字一蹶至此聞已改教不日當  
與先生同僚亦不幸中之幸也

答高麗駙馬都尉豐山君洪顯周書

頃許君齋到雲函並繭紙漫九筆扇五種謂以東國駙馬豐山君之所寄發函盟誦始知豐山君因貴宗人晚窩駱皋使星歸里出示不佞詩筆欣然動嗜痂之意不遠數千里殷勤致訊矜飾有加並詢及先靖節及朱子遺跡具見緇衣好賢之雅誼雖未獲一接平生而蒹葭秋水伊人宛在已如近芝暉而親玉樹矣不佞嘗聞古人論交有形交有神交聯茵接席訂諧論年此形交也至於神交則雖山川間隔天各一方而性情通之寤寐見之風

雨蕭蕭鷄鳴嚶嚶初不以地位而稍異甚者古人  
已往且因誦其詩讀其書而慨然有尙友千古之  
想矧生並一世同處

聖皇雨露之中音問可通千里如面復何遠邇之間耶  
不佞生長楚南之長沙在洞庭衡嶽之交地直匡  
廬之西遠祖爲晉太尉桓公諱侃所謂入州都督  
是也太夫人湛氏有截髮延賓事具載晉書原籍  
鄱陽至桓公始封國長沙靖節先生其曾孫也今  
子孫散居吳楚間或有在鄱陽之柴桑或有在湖  
南之長沙或有在江南之蕪湖崑山雲朥頗繁自

靖節至不佞蓋六十餘世矣醉石尙在五柳則僅

有存者至南康距敝居尙遠而朱子帥潭州時

潭州

卽今長沙講學嶽麓山

在長沙城西湘江之濱

今有嶽麓書院爲

海內四大書院之一

爲四皆朱子講學處

有朱

子手書道鄉臺及整齊嚴肅四大字筆法類顏魯

公遺蹟甚多諸生肄業嘗七八百人先賢之流風

尙未沫也不佞幼隨先君子莫江翁讀書其中

一自礪碌軟紅塵中此境殆猶鴻雪矣不佞往閱

圖經見有貴邦學士洪燿書延英閣記甚古雅年

來耳溪先生詩文尤爲先師紀文達公所推許昨

又晤晚窩駱皋兩君子晚窩老成典雅駱皋清標  
玉立皆與不佞一見如故有以知貴族爲東方詩  
書之閥今接觀閣下妙墨益信高明華胄其來有  
自至於函詞珍重語摯情長尤想見劉真長王子  
敬一流人物也遠勞嘉貺愧無以爲木瓜之報輒  
付詩扇一柄對一單條六鼻烟六瓶香茗二餅趙  
帖一本萋萋之意希爲哂納

再答朝鮮權鼎山書

件來手書具審起居佳適爲慰塹山使者稟畧恩  
恩過目燈下草成一序用塞雅屬不足弁珍稟也  
貴友送行各作就其佳者略作評語於上未知有  
當否就中如華西病夫伍伯學昌黎頗得法門矣  
永獻永元兩韓生尤爲情文雙美李晚用洪大用  
筆雖未老亦是將來之秀數子詩余皆擇而錄之  
爲將來選詩之具塹山子詩文余亦錄出數十首  
覺翹然而出其類矣金秋山文筆亦爽但後半眼  
界太小趙存榮詩骨亦古而詞意未醇故不入選

不佞嘗謂東國好詩書獨具華風而詩文流傳者  
頗少從前以職貢來者何啻什伯至今罕有能舉  
其姓氏者非盡短於文墨者也以無人綜輯之抑  
語音障隔倡酬之事少耳今番諸君詩文之樂較  
盛於往歲而足下天材灑落又就質殷殷屈指記  
之尤不易得此行萬里良晤難期殊增悵惘來書  
云行人必欲一面不佞供職臺垣略少暇刻初五  
日午後稍可撥冗當在寓耳所示梅花新詩一篇  
留存敝齋爲後日選刻之地以當東國采風錄可  
也粵山原橐並序及貴友貽作各軸藉伴附還

覆顧南雅待讀書

前接手書甚悉僕因手足之痛心氣大動幾成怔  
忡遲遲始作報書比雲南試差回京接誦教言今  
午又接一面係留任後得信發來者捧讀甚慰惟  
聞尊體披閱太勤竟有手胝之事此則大非所宜  
我輩上報

主知惟在此身與此心而已心宜盡而不宜耗身宜勞  
而不宜苦古人愛身有爲非以圖安逸也其進銳  
者其退速恐精神過用後將有所不繼或轉以致  
疏虞是急於酬



恩反以孤

恩也可不慎歟所示知名諸生秋闈已多捷發足見相  
士之確而前面有縣府批首多不取之語昨函又  
言官場不無怨恨以不能俯仰從令之故此二事  
須分別觀之如地方官有陵辱士子或要求干請  
自不宜俯仰若批首係地方官所取偶因小疵輒  
棄置其有弊者固不妨任其怨其無弊者又安可  
生其恨乎況批首入場往往矜持太過失其故步  
未必盡關弊竇往見批首有被遺自盡者其情亦  
覺可憫望於此等處再加子細非曰邀譽於人也

清而勿刻亦體帖物情之一端耳至於愛惜士子  
自屬我輩當然之理但宜存之於心不宜出之於  
口恐俗士未能體會或以愛惜長其虛憍及至陷  
於罪戾欲救之而不能是亦不可不慮其終也林  
逆餘黨已靖滑縣已復可謂敷天之慶惟深冬無  
雪殊切懸望彭十一令楚雄本可有爲而忽動歸  
興然伊堂上俱年高卽歸亦得也

與趙笛樓觀察書

今春曾致一書未諭已達否比陳荔蓀袖出手書  
語長情重如晤道微惟聞近抱脊令之痛深爲惋  
惜侍亦慘遭此變僅有一弟在籍病故形單影隻  
熒熒千里外視先生之得親嘗灼艾目視含飯者  
其爲痛不尤深耶且弱妻獨子熒熒無依勢不能  
不接取來京而摒擋匪易先生其謂之何同鄉諸  
君惟彭寶臣分校京闈錦橋前輩主試江西侍於  
七月望間與歐陽坦齋石黼廷方雪浦同邀記名  
御史用約計來秋可以得缺惟此官實不易爲動

招物忌卽如江南道長李仲昭去冬劾查某僞造加重法馬一案彼時戶部諸人皆欲左袒於查其戚友皆一二品大員左摘右摘造爲謗言謂李因借貸不遂而劾之吠影吠聲幾致變亂黑白幸

天子神聖命成邸同訊得論如律爲查氏平日所利餌之人無不恨之仲昭旋又劾吏部京察不公亦得審實於是吏部之人大怒本年赴戶部點卯杖責數人而戶部之人復大怒本部堂官至乃倡言李御史杖書吏卽杖司官之漸浸假將及我輩有

旨下部議時七月初四日也初頤園先生方以妻喪在

告竊歎息諸公欲報去年之事而加以作弊之稱  
與莫須有何異李御史尙有言膽臺中何可無此  
人部員聞其言遂連夜辦稟議以實降四級及初  
公以初八日銷假而部議已於初六日下矣自奉  
旨暨議覆奉

旨僅隔兩日耳自來無如此之速者雖諸公去疾務盡  
然堂堂大老數人同護一書吏以逐言官殆與休  
休有容者異矣此事公論旣不平之李御史以母  
年老不辨而歸先生倘與見面不可不悉此原委  
以先生古道照人輒爲縷述如此至侍之才疏學

淺尤多未宜尙乞先生以平素自得之功俯賜教  
示俾後學有所遵循不勝企望

覆王垣夫先生書

卯秋長沙一別彈指十一年矣每憶麓山風雨斗  
酒縱談先生與先子笑貌聲音宛乎如昨今夏  
平舫明經入都出示手書語長情重如親長者之  
側爲想先生名山養重道味增腴近復纂輯宗乘  
以序見屬荒蕪之餘尙祈刪政至所示云言官任  
天下之重必爲

國家建久安長治之規斯誠愛人以德大儒之用心  
書中皆經國大計非上下千古者不能言之如此  
其鑿鑿也惟僕自顧尙未足以語此且按之時勢

亦容有未盡然者蓋

國家之事未盡捐之爲害而耗財之蠹亦不盡由於邊防也往者西北一帶辟地萬里戎裝戍費誠不能不多有所耗近則屯田日闢伊犁烏魯木齊等處人烟稠密與內地無異而麥麴羊豕之屬價亦甚賤是以內地之民視爲樂土趨之若鶩不待戍守而所費亦漸減矣其蒙古外藩四十九旗王公貝勒稽首來王匪頒有定百餘年來未之有改亦不俟此時始見細也至我

朝武功克捷實恃八旗勁旅若健銳營步軍營火器



營之類卽唐府兵之制也其各省營兵才力本弱  
國家亦不甚資其力但以之防守各汛亦不可少其  
操演疎懈乃將弁之咎非法有未良也計天下錢  
糧每歲可得四千六百萬官俸軍餉之外所餘六  
七百萬而已而年歲之旱乾水溢不齊蠲緩亦在  
其中是庫項本不能多有所餘也一遇軍興如川  
楚之苗匪教匪用兵幾及十年所用不下二萬萬  
兼之河道不通時有決溢堵築一切動須數百萬  
金此在前朝皆於正餉之外另派於民我

朝則概出自官而正賦又不足以供意外之用於是

捐例不能不開蓋加賦則病在平民開捐則取之富民兩者相權勢不能不出於此是以前年開豫東例時科道交章言其不便而勢不能止然

聖明實已洞鑒其弊特以一時權宜不半載而已停止矣至治河之費每年修築實屬不貲然京師百萬生靈皆仰給於東南治河卽所以治漕是亦斷不可少之工也議者謂漕米至京一石費二十餘金官民交困不若於直隸一帶大興水利則南漕可減而河費可省此誠探本之論但溝洫之制自秦以來久廢北方沙土旣無引水之路又無儲水之

區種稻非宜且以一旦而復二代之制於二千年  
以上恐利未見而民已擾矣非常之原談何容易  
竊謂我

朝之制滿漢各別而滿未嘗侵漢兵民各分而兵不  
能擾民中外一統而防秋出塞之苦不生文武一  
體而重內輕外之衅不作

乾綱獨攬而朝無權臣

萬幾日理而旁無近倖立法實已周詳綱紀無難整肅  
所以不能久而無弊者則非法之未良實以任事  
者之難其人耳京官照常供職本無設施於民在

外者莫如州縣爲親民之官州縣得人而天下咸  
理矣州縣非其人督撫例得而去之然而是非顛  
倒賢愚混置者不一而足也天下之未能悉協於  
理實由於此是以僕於甲戌冬上疏請清吏治之  
源痛言其弊又陳治河之弊三吏部重簽之弊五  
此外如靖紅鬍申保甲教習旗人以專訓課參劾  
汚吏以肅官常前後奏事數十摺多蒙

聖主採納

召見之次

特加獎訓至今夙夜捫心未嘗不且慚且奮也計此十

年間典文衡者再監場事者五巡漕查倉查庫者  
各一至於磨勘驗看差使更不一而足前此巡中  
城爲五城之首以十月而結八百餘案後巡南漕  
爲六省糧漕總匯亦以半載而辦五百餘萬石之  
米早於上年兩月爲前後十餘年所未有近掌吏  
科爲六科之首天下文官總樞案牘如鱗亦以一  
手治之未嘗假之書吏戰戰兢兢幸得免於罪罟  
此皆 先人遺訓與先生昔日聚處時之緒論也  
慨憶當年曷勝洞溯因來書問近狀甚殷故敢縷  
數以答時漏下已三十刻矣

謝邑人公舉 先君子崇祀鄉賢書

隔別桑梓屈指近十年矣每念吾鄉諸先生輒惓然動關河契闊之思以遠人之念鄉里知諸先生之念遠人也憶自戊辰秋赴京庚午典試蜀都甲戌獲擢御史分校禮闈乙亥復擢戶垣聽馬巡城未及一載卽奉

命督贛南漕輓塵甫息又於本年八月奉

命監試內簾接充磨勘

天恩稠疊報稱無由自維謫陋惟有竭誠可以自勉前歲蒞事中城曾於廳堂大書一聯自警云繞案風

清塵璫掃除吏牘舉頭日近光明洞照吾心又書  
一聯於座右云要半文不值半文莫道人無知者  
辦一事須了一事如此心乃安然本年夏間南漕  
事竣回京覆

命江南人至於攀轅灑淚又於揚州之雨花菴設立長  
生祿位不虞之譽將景增慚然所以戰戰慄慄不  
敢暴棄者欲以勉承先志少副鄉里諸公之望毋  
爲長者羞而已至先志之能負荷與否則行百里  
者半九十尙未能以自必也昨王平舫茂才書來  
道及我邑諸大人先生連名具呈請以 先君子

崇祀鄉賢三代之直復見於今聞之曷勝感激念  
先君子篤志勵行每欲爲鄉里增光樹幟而命  
與遇違齋志未逮今諸先生乃發潛闡幽好是懿  
德此在聞風者且將興起矧於其家於其子孫有  
不感泣從之者耶至小女瓊姿年甫十二未嫻女  
誡因癸酉之冬母病垂危雪夜操刀割腕療母事  
出倉卒偶獲兩全本非家門之順事蓋緣小子之  
無知而諸先生至性所孚芻蕘必采憐其小弱而  
亦附之請

旌此種義舉彌覺令人感媿從此型方訓俗咸切觀摩



匪特寒門戢泐永矢弗諼實足徵吾邑之人心敦  
龐篤摯而諸先生善善從長之盛心尤不可幾及  
也

覆秦小峴侍郎書

芙初來京詢及起居知近日講學東林以身任道  
彼方之士何幸得此古者師儒之教繫之鄉大夫  
正其事也惟聞道高毀來竟有不識東家某者此  
則善者好不善者惡吾道之異於鄉愿在是士君  
子所言所行當期之天下後世固非一鄉所能私  
其毀譽也京尹賄項鄒李宋三公任之以前者皆  
不與可以脫然無累林泉引退在先生非以鳴高  
事後觀之竟有欲不退而不能者然後知先生之  
爲高而一疏之事有不足艷者矣謝自送別後改

官臺諫自顧識力短淺遠於事情望先生有以教  
我也

覆秦小峴侍郎書

春間接讀手書適奉監試內簾之

命出闈後酬應紛紛久稽裁復今歲仍忝主講東林尊  
集聞已續刻若干便中尙希惠示全部以紓渴望  
此日東南尊宿惟先生與穀人先生蒼然並峙如  
魯靈光穀人先生去歲在場相見猶復賴面豐頤  
迺郎清鵬今科鼎甲足爲稽古之榮先生遂初早  
賦道力日增海內之士談出處者莫不歎爲高見  
庶幾追蹤張季鷹賀季真一流而鄉里所宜矜式  
者也顧書中所云時有慨乎言之此則魯人呼東

家某之故轍人固有日相接而不相知者不盲於  
目而盲於心則亦無怪其然也澍供職吏科每歎  
鹿鹿未能窺見其大若毛舉細故又竊所未安竊  
念爾日錮弊甚多非一紙空言所能盡革而其害  
尤在於人心之日壞風俗之日媮若不揣其本終  
未見末之能齊也倘高識別有所及幸勿吝鍼教  
焉

與卓海帆侍御書

閱鈔知巡視中城喜不自勝非爲足下喜爲中城喜也以仁弟之才十倍於兄而謹慎沈默游刃恢恢則又兄素所心儀者也兄巡城十月毫無善狀所能自信者此心無他實欲爲地方了事不爲地方多事以求至於無事而後快至於檢點不到之處他人亦能爲我諒之以仁弟處此則然兄所短亦可全無而悉底於美善矣然兄竊有所進者仁弟前致兄書欲自處於和介之間此語至今未及奉復然亦終不敢不質之仁弟者蓋聞和介之分

莫如夷惠孔子則時中而已所謂時中者當和則和當介則介之謂非調和與介可以合併爲一此子莫之執中而鄉愿之所以取巧也之間二字似無可著腳處兄愆尤叢集而以此言奉質者以仁弟有聖賢之資而進道未已故敢發此狂談耳至若爲政之法隨時隨地不競不綌古來治京兆者趙張韓蓋皆以精果著稱而曹平陽之論則又曰慎勿擾獄市知此二說則巡城之事思過半矣抑此兄舊令尹之言耳若仁弟之巡漕其美舉佳政甚多尙乞悉以見示俾得免於愆尤同年諸君在

京師者皆有骨肉之誼別後相思輒覺一日三秋  
而公務恩恩無片刻之暇尙未及一一作書幸爲  
兄道意並恕其不周也



覆陸平泉師書

頃摺弁於十三日回揚接奉手書敬悉福履綏安  
實深抃頌來諭一切辦公固不可苟隨流俗亦不  
可太事苛細總以持平爲當誨語諄諄敬當書佩  
徒陽開壩一摺歷任以來多係驛遞卽上屆亦係  
單摺一件用驛是以蘭渚中丞誤照辦理摺由伊  
繕發事後始知不勝惶悚對自到任以來俱係專  
差獨開壩一摺爲張公所誤仰荷

天恩改爲降留

高厚鴻慈摩頂難報擬俟將來奏事時附摺恭謝亦不

復與張公會銜矣至戲園命案一事向來城上不  
過照轉送部而已從無駁訊之事彼時卽有言何  
不將戲園封閉者澍以爲兇手現在本係雇工並  
非園主查例並無因有命案卽命主家廢業之文  
罪人不孥古有明訓何況雇工譬如一農遭事而  
令全家廢耕一士遭事而令全家罷讀無是理也  
况暫時封閉將來仍不免於求開徒使胥役從中  
誑索陽鱗到處干求旣滋拖累亦增煩聒是以過  
堂時將兇手同園主一併送部諭以將來刑部結  
案卽使園主無干亦當治以約束不嚴之罪並諭

司官先行揭示園前以示警戒竊謂威惠兼施葛  
藤豫斷古人所謂經術飾吏治或在於此而孰意  
人言反以爲怪也澍於此等處所頗爲揆情準理  
斷以不滋拖累爲是若因此而蒙罪戾亦無所悔  
耳至現在漕務一切雖無城務之阻撓而總六省  
之轉輸督撫漕河兩帥以至道府守令處處俱有  
交涉事件竟無閒刻兼之本年全漕有搭解米石  
較上年竟多一倍尤不易易日前西風久刮雨雪  
復稀江落潮枯軍船淺阻羽檄飛馳寢食俱廢幸  
十三日風轉潮回始得陸續催挽然已設法無數

矣今日手揮檄梟二十餘紙漏盡三鼓字蹟草率  
伏祈原鑒不宣

與百菊溪制府書

昨午接到除邪紀畧一卷敬悉英謀碩畫除患未  
形所謂不動聲色而措磐石之安者令人想見陶  
桓公韓魏公一輩人觀於籌略之精布置之善足  
昭

朝廷委用得人之歟

恩褒疊被超格膺封有自來矣至孫文定公南遊記一  
篇首尾一氣如黃河落天直走東海其間又復千  
里大曲百里小曲洋洋乎淵淵乎近古之奇作也  
惟中間亦小有未檢處如曼倩公明古平原人在

今之武定而誤以德州之平原當之岷山爲南幹之祖禹貢明言岷山之陽至于衡山而誤以爲中幹且末後總東一段言天下大勢水歸二漕山分三幹是已而又言大河以北水皆南流大江以南水皆北注此則以指喻海尙非天下之全也蓋地脈以山爲脊而水從兩邊界之南幹龍縱行以五嶺爲脊嶺以北江廣之水固皆北流若粵閩在嶺脊之南仍係東南流非北注也北幹龍橫行以太行爲脊太行之右如汾涑皆西南流太行之左如漳衛滹沱巨馬易白諸水皆東北流無南流者惟

沁在太行南麓故順流而下又邳宿南流則疏鑿而成非其本來也至若三幹之說昉於僧一行千餘年來莫之或易然澍竊有創論以爲仍止兩幹岷山之脈曼衍東南此南幹也其中幹北幹本係一脈從隴西來爲嶓冢經太白至終南始分支一出華潼渡砥柱起太行爲北幹直走醫巫閭入海至高麗南轉浮登萊而結聚於太山一由終南趨商雒爲中幹經南汝光陳至徐州渡河經呂梁下邳鄒嶧而亦聚於太山故終南爲中幹北幹分龍之所而太山爲中幹北幹合龍之所實首尾一龍

耳其間元氣包裹條理精密此中原人物所以極盛而孔孟生於氣聚之處遂以砥柱萬世也澍嘗出使西川途中細觀山勢見太行之脈從壽陽之黃土嶺出脈僅如一線終南之脈從寶雞之煎茶坪出脈亦僅如一線計此兩大山行經數千里每過一峽必出一脈似此者數矣蜿蜒磅礴其大如彼而其細又如此造化之妙非身歷其境者不知僅從紙上談兵終隔一塵然非胸有全局亦熟視之無睹也文定此文獨有千古高處在識其小未檢點亦無損毫末大抵其生平剛毅之氣練達之



識皆如此可想見一班合三習一弊疏觀之眞我  
朝第一流人物也謹質蠡測之私伏惟治事之暇加  
以誨正爲幸

陶文毅公全集卷四十一目錄

文集書

覆曹方伯韓廉訪書

上蔣礪堂先生書

覆賀耦耕太史書

與周石芳先生書

覆李錫民漕使書

覆黎湛溪河帥書

與姚秋農學使書

與董小槎太史書

覆劉海樹署守書

與湖廣李制軍書

與湖南嵩撫軍書

與賀耦耕方伯書

覆煦齋相國書

覆兩湖訥制軍書

覆兩湖訥制軍書

再覆兩湖訥制軍書

覆兩廣盧制軍書

致江西廉訪陳蓮士書

覆黃楚橘書

文集

書

覆曹方伯韓廉訪書

頃奉華函以弟所擬官鹽減價告示蒙制憲面交  
熟商仰承精心籌畫斟酌權宜並諭以川省向來  
例價以錢糧之長跌出入合筭售賣若一經出示  
恐商民誤爲例價將來或有窒礙杜漸防微識度  
宏遠惟弟之所以力主此議者正以川鹽無例價  
旋減旋增私販因得以乘機而入是民病而商亦  
未必利也原減價之議所以受制於商而官亦不  
敢深問者大約不出成本

國課兩條查成本雖有遠近之不同總以場價爲最重要亦不過十數文止耳卽以巴縣江北而論上年減價文書稱巴鹽每斤場價二十三文此僞說也試思南川涪州等處亦行射蓬鹽引止稱場價十七文以道路言則彼遠而此近何以遠者賤而近者反貴是所開場價不足據也且去歲之鹽稱成本每斤三十二文減價爲二十九文月前傳到該商等又呈稱向來成本二十七文是此時所言成本較上歲相差五文較所減之價且少二文前後矛盾其僞可知竊思上年文書名爲減價已暗

伏將來增價之根耳至於

國課本在成本內計筭查水引一張計鹽五千斤實則萬斤止徵稅銀三兩四錢零五釐羨餘三四兩不等巴縣爲鹽引最多之處每年額行鹽斤二百八十萬有奇無論四鄉之遠千萬之衆均須食鹽卽渝城丁口不下百餘萬每人月食半斤不過三四個月可了再加耗鹽一倍亦不過八九月可了苟夾帶不甚則官引方有不足之患尙何

國課之能虧乎至鹽引納課用銀零賣用錢則亦不獨川省爲然如淮蘆皆用課銀而鹽斤加價則稱

一文二文亦未聞因錢價起落有所更改竊意川鹽所以無例價之故因產鹽處較多各縣亦不止銷一處之鹽而又有巴鹽花鹽頭鹽渣鹽名目之不同非如淮蘆之鹽止一色產有定地也然亦間有例價如上歲雲陽縣減價詳文卽稱雲場部定例價每包價銀六錢八分每斤合錢十二三文又萬縣文內稱報部價值每斤定銀一分五釐均係詳定價值商民相安無事無庸另擬等語可見川鹽亦未必不可定價卽使將來認減價爲例價究與部頒有別未必不可活動卽如川鹽每包百斤



例載加耗十五斤今則每包重至一百八十斤頭  
鹽且二百斤矣未聞百姓執部例以與商人爭也  
弟因冬臘以來鹽價平而人心亦平正月以後鹽  
價起而私販復起身居此地日夜兢惕當此饑饉  
之際徒事查拏勢必私販未靖而良民先驚遠近  
傳訛恐滋事端細思散黨之法惟有減價一策上  
歲已行之有效但未出示是以可大而未能可久  
耳連日札飭面諭再三審酌示以必行幸而半月  
以來人心復戢方建議之初已慮及商民日後或  
有嘵詞當諭該廳縣以必得商民呈請方可並將

弟所擬示稟示之商等見措詞平允利害曉然欣然具呈該廳縣懇請遵照減價由府核轉前來此本月初十日後事也其時廳縣業已出示減價弟意欲乘此徧及各屬是以將稟未發呈請憲裁茲接來諭以憲意欲令商人呈請爲妥與現在所辦情形恰相符合謹另繕該府詳文呈覽其所以尙未通詳者因尙非全局欲徐加鄭重耳惟出示一層商人呈詞未載此時若令補寫轉恐反生枝節且廳縣業已出示載明所減之價四鄉行之相安官鹽暢銷弟處告示商人前已見之外間皆知若

忽然中止勢有未可但弟處出示祇須照例廳縣  
出示稍可活動自是老成碩畫思深慮遠擬彙二  
件詳細周密洞切事宜謹當遵照辦理祇前半所  
敘

上諭原爲插牌擅寫違例字樣而言渝屬尙無此風擬  
將私梟刑例裝換數語其所減價值則廳縣告示  
有之弟處卽不必敘及至其餘各處弟處尙未行  
文飭減據陳署守言及查得上年減價案內有藩  
臺鹽道飭駁文書一件諭及所減價值尙不足以  
敵私飭令該府縣從長再議等語足見先幾灼見

早已洞燭無遺現經署守裝敘原文駁行各處俟  
覆到日再行斟酌辦理總之此次減價出示情形  
亦是時勢所在不得已而爲之其相安之處原不  
敢輕有舉動也尙希縷悉代爲稟覆用慰憲廑

上蔣礪堂先生書

川省官鹽向無定價大抵因行銷地面有一州縣而配食數處鹽斤者亦有產鹽之地又向他處場竈配鹽銷售者其間程途遠近不一鹽之名色又有巴花頭渣之別場價既有低昂運費亦有輕重加之商人以銀易鹽以鹽售錢更需計較銀錢長跌價值是以賣價悉聽商人隨時定數然商店價無準則難保不任意浮多而鋪戶輾轉販賣又勢必有所加增以致小民常虞食貴私販每多攙越殊於課食均有關礙上年蒙大人燭悉情形札飭

各屬核筭場價運費酌議平減此誠便民戢私之美政奉到憲檄後即經前陞道嚴士鉉轉飭確查議覆去後嗣據該府州廳轉據各州縣悉就情形查議或請酌減價值出售或請仍照現價發賣先後申覆經前護道林培厚及澍核明轉移鹽道查議具詳在案本年二月間澍因聞重慶府屬江北廳巴縣等處官鹽價值較昂民間仍有貪賤食私之事而私販亦得乘機銷售漁利未能淨盡是欲杜私益民必須官鹽價值大加酌減方可以收實效當經札飭該府轉飭該廳縣等諭令商人核計

成本查照上年議定賣價再行從長計議酌量平減茲據江北廳巴縣飭據鹽商秦寅等以配銷引鹽向有四項名色花鹽每斤計需成本錢二十三文巴鹽每斤計需成本錢二十五文渣鹽每斤計需成本錢二十二文頭鹽每斤計需成本錢二十七文今情願稍折成本呈請減價等情經該廳縣查明上年議定鹽價原案分別核議巴花等四項鹽斤整包出售照現在成本每斤俱減二文其零星小店輾轉售賣按照現議各色鹽價每斤酌增錢二文以敷折耗如挑赴鄉間出賣者各計程途

遠近量加運費定以每斤每百里再加運腳錢一文各店鹽秤均以十六兩爲準聲明傳諭鹽商遵照並出示曉諭等情由府核覆前來澍查核廳縣現議各色鹽價核對上年重慶府原冊每斤俱又減價四五文民間不致食貴且經該廳縣等出示曉諭章程既著商人等亦不敢陽奉陰違現在訪察各處市集村莊均已買食官鹽私販亦俱絕跡地方俱屬清謐至其餘重屬各州縣業經陳署守札飭查議此外夔綏忠酉石太等處澍現擬一體札飭查察情形酌量應否議減統俟查覆至日再



行稟聞

陶文毅公全集

卷四十一

文集

覆賀耦耕太史書

四月二十一日得花太守攜來一書情真意摯語  
語腳踏實地可見施行三年作別而親家所詣遂  
已至此雖古名賢無以過自莅任以來所得友信  
惟親家與樂園南雅之書大有資於身心政事時  
懸座陽以當箴銘也此間吏治敗壞已久綱維不  
整諸事疏略官場以用兵爲利而循良之意少百  
姓惟趨利是圖而親故之誼疎上行下效有自來  
矣礪堂先生諸事整飭民間始見天日而革面已  
多革心尙少欲求上理必資遠策觀其殷殷懇懇

求賢若渴苟有人心不忍負之數月以來蒙其獎  
誇什伯尋常言聽計從毫無成見甚至以清廉公  
正見褒且語人云他人到一處數月方悉情形惟  
陶某一到便透澈無遺自顧何人初不料先生之  
見重如此也然先生天資之高學識之精殆有天  
授非人所能爲者每鄙意所疑所思未獲一言導  
窾出人意又恰在人意中始知欲從末由顏淵  
卓爾之歎非偶然也弟初到時尙有因畏生忌造  
言相訕之人開誠布公秉直而行久之而人自信  
服今則上下已交孚矣是卽親家所言接人辦事

老實爲妙之說也。生性素銳，每以沒世無稱爲懼。然所長在此，所短亦在此。今則閱歷頗多，名心漸化。惟用人之際，外嚴內寬，多爲小人所測度。讀來書，不覺懼然自懼也。

與周石芳先生書

日昨閱鈔知令嗣克生已蒙

恩開復此誠曠蕩之仁爲感動者久之想賢喬梓之感  
深圖報又不知何如肫摯也克生才高識廣經此  
番磨鍊之後必當痛定思痛慎勿以

君恩爲可倖邀而不於保身立家之術切實思維也叨  
在至戚深爲克生喜自不得不爲克生懼也尊府  
深仁厚德積累自不待言惟於讀書一事悠悠忽  
忽毫不介意大有倚恃名父坐享富貴之意不知  
名門世家之子京師中落寞何限一旦失勢欲如

常人而不可得世俗炎涼大抵如斯求其可久惟有精進之一法興言及此實不能不爲慧生吾倩有餘傲也錦橋先生擢刑給鏡海耦耕一麾出守皆有大用之兆皆同鄉好榜樣近日吾湘南拔茅連茹半年來喬起無數如樂園剛亭兩先生人所共知而親家前輩大人海內人望

特詔起用受

恩尤深苟非平日自立不凡焉能至此克生昆弟其能不思肯其堂構耶僕此言蓄之已久前此不言而今始言之者正以前此當不得意之時疑於太激

而今則受寵若驚不敢不告也芻蕘之言幸勿以爲弗達時務而置之

覆李錫民漕使書

昨泐一函由陳中丞奉寄今午摺弁齎到手書並  
橐籥五本欣悉軍船回空旣早首進已渡江足見  
事機順利亦由宏才料理合宜故爾過速如此聞  
鎮江水勢甚足重船定可無滯惟尊札所言諸事  
格越積錮太深法語異言轉以爲嗤切中彼間情  
形益可見一篇散帳人人可主持人人不能主持  
而擔當之責不能不歸之於漕使矣如閣下可爲  
漕務得人慶然亦一年之局耳安得福星一路盡  
如子駿哉鎮江河道僕所條陳四事自以濬練湖



爲第一義而修閘則尤以橫越二處爲要害今濬  
湖之說旣不行而橫越二閘又復委之木商恐仍  
有名無實徒費工項則罪過且在於始議者矣倘  
得就近督率一二亦後來之幸也

覆黎湛溪河帥書

前承寄到行水金鑑當經肅謝昨復蒙賜書並覆  
奏鎮江運河摺橐一件諸紉存注敬維吾兄以間  
世之才肩重鉅之任爲秀才而不忘天下居高位  
而有若寒儒平日之所講求臨期之所規畫灼有  
神解粲若眉列前歲趨運京江偶逢涸轍旁觀者  
旣策窮於束手當事者或絲棼於亂麻徒勞往復  
祇類道謀已乃於舊橐中拾讀吾兄修理練湖一  
書不禁慨然太息以爲地方守牧能如此用心者  
罕矣如此用心而又能練達通明卓然可見之施

行者則尤僅見也因是思所以變通之爲將來之利其抽埽出土之法則親聆之吾兄徧閱古人所議亦無計及於此者今旣訂期興工無窮之利實賴嘉謨矣惟是橫越二閘爲全河收蓄要害之區若來源疏通而此處關欄不住亦屬無益必得閘底撥高下膺畧長於上膺庶潮洞不至掣退而可以回激豬婆灘之上今乃仍歸木商修理竊恐有名無實利於下行而不利於上濟此事業已定議諒難更改惟在司事者認真照料不可徒聽之商人耳見孫制軍時尙乞詳悉陳之區區過慮之言

亦芻蕘獻議之意也

與姚秋農學使書

自客冬抵皖已經半載祇以此地錢糧轉輸奉

旨清查牛毛繭絲之中千頭萬緒近始窺見底裏果然  
名不虛傳卽如清查一事他省偶一見之而皖省  
自嘉慶七年至十九年五次清查仍未了結自十  
九年至今又已七八年未查者須續查已查者又  
須復查其間官更更換卷冊如鱗一筭偶差全盤  
盡錯其難辦者一也又如豁免一事前已奏出官  
虧五百餘萬民虧四百餘萬以五十四州縣負此  
千萬兩之重累其顛蹶自不待言今雖據

恩請免而格於部議十不能去其二三輾轉糾纏虛同  
匏繫其難辦者一也又如錢糧一事緩徵帶徵他  
省或間數歲而一見皖省則鳳泗等處自

國朝以來無歲不賑則無歲不緩無歲不帶其間又  
有成災四五分及六七八分之別其緩帶又有三  
年兩年之不同是卽在一時一手已不能畫一而  
整齊之矣又况今歲所緩之二三分四五分至來  
年而又報五六分六七分則又不得不遞緩而三  
年之帶徵或化而爲五年之帶徵從此重重疊疊  
牽纏不已而本年成災之五六分者仍當徵四五

分成災之七八分者仍當徵二三分倘不能徵之  
如數則牽率更多此皖省積欠所以無休無歇而  
愈久愈繁其難辦者三也又如漕糧漕項同徵分  
解本與藩司衙門相爲表裏號令最宜畫一乃以  
安徽全省之糧道遠駐隔省之江寧水陸迢迢文  
札諸多不便動輒歧異兼之漕督二憲相去均在  
千里遙遙請示多需時日往往坐失機宜設所批  
不同更形掣肘是以錢漕亦多舛誤其難辦者四  
也至於尋常奏銷屢經部駁今所積壓者不下數  
千百起現在亦須趕辦以此碌碌皇皇昕夕靡暇

本非利器難遇錯盤隕越之虞倍深寤寐相隔不  
遠趨晤無由自念生平知己惟先生相賞於驪黃  
未判之先耿耿寸衷辦香遙託尙希衡量少暇俾  
識楷模不勝厚望



與董小樣太史書

前奉手書如獲拱璧數月之久尙稽裁復實以故  
人知我未敢以書記代筆之詞草草作答而公冗  
如絲迄鮮暇晷碌碌至今殊深歉仄然每有人來  
自珂里輒敬詢起居得悉先生年來頤志林泉春  
風化雨樂育英才兼以名山考道造詣益深不朽  
之業訂以千秋翹首經幃可勝企想弟以駑駘姿  
連年爲馬牛走巴山晉水萬里崎嶇受

恩旣重報稱尤難上冬將赴八閩

主上以皖省錢糧膠輳甲於天下

特諭來皖清釐務在披雲睹霄一清宿壻拜

命以來兢兢夙夜如理亂絲近始窺見底裏辦理殊不易易卽如虧空之事他省多者不過一二百萬而止而皖省從前竟至于餘萬

恩免之後尚不下數百萬災賑之事他省偶一見之而鳳泗一帶無歲不有偏災卽無歲不有緩帶錢與漕爲同條其貫之事而糧道遠在金陵商辦每難畫一督撫河漕相去俱各千里稟示亦不能如期凡此數端皆爲轆轤之由而他省所未有也兼之地夾江淮水陸交衝差使絡繹河漕災務數大端

色色非錢糧不行而通其止五十九州縣真有袖  
小不堪迴旋之勢此所以虧空甲於天下自嘉慶  
七年至十九年已清查五次而不能得其要領也  
自十九年以後又已數年兼欲溯查五次以前至  
於乾隆中歲舉百餘年之轆轤悉欲掃蕩廓清於  
一旦其爲忙碌已不勝言而

欽限甚迫九月杪卽須盡行奏出此所以日夜慄慄伏  
案勾稽如老諸生目耕之不遑也至於地方之大  
利大弊一切措置尙未遑從事誠以體立用行虧  
空未清而欲吏治之澄敘不可得也吏治不清而

欲民生之康樂不可得也區區之慮如此從前雕蟲篆刻蟬噪蛩吟之習非無夙癖已不暇恩恩唱渭城矣惟省城書院日漸廢弛不得不加整理現已飭屬捐貲以充膏火又安徽自分省以來尙無省志弟意欲俟清查告竣卽當辦理此事而事體重大非得如閣下之貫通今古思精慮細不足以舉全局而資就正是以專差請主敬敷一席以爲此邦人之矜式倘來歲省志議可成得以仰煩大筆裁削尤幸甚幸甚平叔中丞現赴潁州審辦教匪滋事一案弟叨庇平善於七月十一日得舉一

子行年半九十有此於菟亦足慰塵望也

覆劉海樹署守書

本月十六日晚間接到十二日所發書欣悉公蓋  
宣勞刑名章一案辦理妥速陳悅張愛等既已獲  
案且豫知逆情雖據稱藉詞逃回並未到官具首  
未可輕縱前此王興仁朱麻孜王友諒等俱係曾  
經到案開釋之人此次仍自外生成挂累多人所  
謂自作孽不可追者無可愛惜卽應執法以淨根  
株至於愚民習教並未豫知逆情之人則又當別  
論潛移默化責在我輩未可瓜蔓滋擾致釀事端  
也此案發覺恰在撫憲赴金陵監臨秋闈之際弟

前此所以深不放心而欲自往者正以此故今得  
廉訪親往同觀察諸公督辦妥協而閣下文武兼  
資既能見幾致決於前復能息事安人於後鄙衷  
尤深欽佩弟日前曾將潁昌新蔡教匪源流查照  
厯辦各案作爲表說交吳牧甸華帶去尊處訊案  
時亦可查照以究其根蒂也撫憲擬俟二十七八  
日闌卷騰完卽赴潁審辦此案旣省千餘里押解  
之煩且審明後卽在彼處正法使餘黨知所畏懼  
於地方大爲有益而所省解費當不下二三千金  
亦可謂不費之惠至前次吳牧送去千金卽是兵

役經費非盡爲犒賞而設如將來事竣應由該縣  
籌款萬一所費不貲力不能支尙可稍爲接濟但  
不能一概委之於公反於彼未便也希諭孫令知  
之廬州高守未及另械此信可同觀也



與湖廣李制軍書

頃奉

諭旨准戶部議以湖南常平倉穀碾米運京另行買補  
還倉在司農自爲慎重

天庾起見惟揣度時勢自上年水災之後江浙各處  
聯船赴楚買米地方積穀已空且本省長岳常澧  
各屬濱近洞庭亦有水災地方元氣未復現聞米  
價二兩有餘較下江尙貴兼之近山各州縣水路  
難通雖有腳價殷盤不易即使有穀可運而漕船  
僅止二三幫難於搭運勢必添雇駁船大爲州縣之

累虧空將自此而增民欠亦因之起矣種種難行之處自在高明洞鑒之中而芻蕘所及尤有難焉者查湖南山多田少宜稻之處無幾諺云三山六水一分田其地利已可概見是以通省有漕地方祇三分之一每年正兌漕糧共祇九萬五千有零視江浙大省不及十分之一誠以其地狹而出產無多也今若因碾運而採買還倉是一漕之外又添數倍之漕在有漕州縣勢已難支至若山區僻地本境之糧不敷食用平時尙仰給別處是以

列聖施恩免其漕運二百年來百姓相安無事今若以倉

穀礮運而採買還倉是倉穀化爲漕米採買之舉  
卽爲無漕之區添一漕也無論山區少穀買補無  
期萬一將來援以爲例卽開永遠之累竊恐

累朝休養生息之民從此困於騷擾矣况常平倉一空地  
方緩急失恃其接近苗疆之區尤爲可慮近來如  
醴陵平江等處多以辦漕滋事幸賴大賢在上民  
困獲甦豈可添此累民累官之事且其害終歸於  
國家關繫甚重竊以爲此舉不但今年難行卽將來  
亦不可行伏惟大前輩大人識炯幾先精權事後  
湖湘之民望切瞻依查現在直隸豐收無須接濟

臺灣運米一事尙爲贅設而本年江浙各省均係全漕似於

天儲不至有缺日昨江省接到戶部收買行月米一事經魏漕院據實入

奏卽荷

諭旨停止仰見

聖天子視民如傷必不以戶部奏准在前任滋格礙倘荷俯察羣情札商蓮舫中丞早爲覆

奏地方幸甚澍忝鄉人頗悉草野情形素恃虛懷若谷故敢抒其聞見惟希採照

與湖南嵩撫軍書

頃奉

諭旨准戶部議以湖南常平倉穀碾米運京另行買補  
還倉等因在司農自爲鄭重

天庾起見惟是揣度時勢殊有難行者輒卽芻蕘所  
見敬爲陳之查會典載湖南各縣額貯常平倉穀  
一百四十八萬七千七百一十二石以二穀一米  
計之約得米七十餘萬石各州縣多者一二萬石  
少亦六七千石卽毫無虧短而礮碓之費不貲船  
隻之雇弗易其無水陸可通者勢必踰山越嶺長

途絡繹雖有腳價何能勝用况每年漕船止有三幫今撥運之米多於漕糧四五倍縱使丁役毫無刁難亦難盡載必須添雇船隻費從何出勢必大增州縣之累其難行者一也上年大江南北猝被水災競赴楚省採買商船絡繹連檣而下民間積穀俱已糶盡不得謂之餘米之區况上年南省濱湖各屬亦有水災民間元氣未復現聞湖南米價每石約二千二百有零較之江浙時價早已過之且聞江省現有載運雜糧至楚省糶賣者是穀既無餘而價又不賤其難行者二也從來吏役害民

其弊不一雖

功令森嚴而假公濟私者無處無之向聞湖南例價  
每石五錢即使盡行實給民力已屬難支况又未  
必能然近來醴陵平江等處因漕滋事已非一端  
幸賴

聖恩高厚民困獲甦而

國家採買之令亦久未施行也今此舉若行則吏雖  
廉而不能爲無米之炊民雖愿而不能勝打門之  
擾其接近苗疆之處則穀產已竭何以爲防卽稍  
有贏糧之區倘市價擡高貧何能救而州縣碾兌

既多賠墊採辦重須剝削其稍經理不善者勢必  
補於倉而缺於庫其難行者三也湖南一省除稻  
穀外如麥黍菽稷皆非所宜而各州縣又非盡種  
稻之區諺云三山六水一分田其爲地力已可概  
見是以每年正兌漕糧其祇九萬五千五百五十  
二石有奇不及江浙大省漕米二十分之一誠以  
其地狹而出產無多也今若因碾運而加以採買  
使民間頓增一百餘萬之累是有漕之區不第加  
數倍之漕也况湖南無漕之區居三分之二從前  
原因其山多田少不敷民食是以



列聖施恩寬免百姓相安於光天化日之下者已一百九十餘年矣今一旦改爲碾運是倉穀變爲漕米無漕之區亦變爲有漕之累也此端一開將來卽以爲例小民何由得生此其不可行者四也竊以爲湖南碾米一事不特今歲難行卽將來亦不可行而採買累民碾運累官官民交累其害卒歸於國家是太倉之一粟未必有益而湖南之虧空將自此而起湖南之民欠亦自此而起矣以目前尙稱平善之區一旦迫之使累豈不可惜伏惟裁酌而節宣之幸甚

與賀耦耕方伯書

徒陽運河連日西風江湖不入淺阻難行沿河罾撈本屬無益惟有昔年巡漕時所製鐵鍬箕日來愈用愈精竟大得其力其法用鐵片作箕筐使堅銳易於入土用鐵片八九條縱橫作箕底使水去而沙留箕尾豎長木柄使人從船上持柄將箕斜插入水底箕旁左右有鐵耳用長繩二條繫之數十人從岸上拽之起每鐵箕四隻竟可出土一方較之戽水後所挑乾土更爲得力蓋載土旣多反借水勢助其滑溜易於上岸亦可備刮淺一法也

橫閘出江因水淺不能而漕船之畏焦山象山亦特甚其丁舵旣與大江不習而又不善使風從焦山至瓜洲尙有二十里若乘東風而上未抵瓜洲而風轉西北彼卽不免顛觸於焦象二山之間由其技劣而膽怯也惟有避去焦象二山另開一道從橫閘出口緯挽至甘露寺下對渡瓜洲入口則萬無一失矣頃登北固山望視地勢見象山南接汝山之中間有一缺口可以開鑿成河因委員往視據云果有此缺可以開河名曰二缺口尙有頭缺口在北緊依象山之尾其缺似有石底不及二

缺口之易於興工也次日復同道府往勘所見相同已命簞手從象山西尾接江之處量起經陸家圩過二缺口東至尹家圩轉灣西南經汝山礮臺下過千顆柳樹家茶菴出灣子橋共計二千八百餘簞路長約十一二里灣子橋卽丹徒橫閘外之橋也此工若成需費二十萬地勢寬平出土近而江水易入可爲永遠之利既可避焦象之險上達瓜洲甚近而船出橫閘逕此出江則內河可以不挑東南之累輕矣惜乎費無所出聊爲閣下一存其說以俟將來耳

覆煦齋相國書

昨由令孫世兄處出示尊槭曷勝企慰從來賢哲  
達觀吉人洞化程正叔之涪州點易王陽明之虎  
水談經皆以遷謫而成聖賢之學仰窺吾師浩蕩  
之懷洵足當之况有二難依依膝下天倫樂敘必  
不以離騷天問稍芥雲夢也澍鹿鹿金閭條經四  
載昨於十一月初四日述職入都初五日入

見十八日跪

安中間疊蒙

召見十二次

聖誨諄諄實深感悚現於二十四日出都臘底當可旋  
蘇也江省頻年豐熟河務亦微有轉機漕事雖無  
善策亦敷衍無虞惟鹽務大不可支有言歸竈丁  
可無誤課者雖係探本之論然立法以人無人則  
法難自立以海運之妥善省費百餘萬添米十餘  
萬尙且不免浮議恐鹽議更難著手耳知吾師忠  
愛在心故纓及之餘不贅

覆兩湖訥制軍書

弟駐浦三月因江湖泛漲疏瀉無由繼以秋雨連綿坐淪苦海支持况瘁寢饋未遑承示辛卯岸費一事果能杜絕將來自可勿追既往應請鴻裁勘辦至鹽道請飭揚商一人赴楚督同岸商經理現在揚商祇贖數人捉襟露肘支撐辦運之不暇既無可派往之人且岸務爲鹽道專責苛索濫應鹽道且不能令行禁止而一揚商又何能獨力以禦惟祈台端飭道核實秉公辦理恤商裕課功德無涯前年

欽使所定每引岸費四錢嗣又加以緝私費一錢經委員王前運司會同鹽道逐款釐定共需三十餘萬兩公費私費皆在其中並非每引四錢專指衙門公需也岸務未澄腳私固不能淨若謂本商通同則必無之事可以理斷蓋商人具有身家卽一船之鹽本已屬不貲豈肯通同無賴之船戶授之以柄在昔短發水腳知而不言則有之今則水腳已核實給發由監掣衙門當堂圓契會同委員點驗散給無從短勒往往裝滿釘封後尙有勒索加增由縣押開之事商人之不能剋扣已爲明證况儀



所捆場吊秤子包買砵跑風刻刻防範如弟所拏  
蔣四長子等各案不下十數起卽係接濟船私之  
人屢經

奏辦嚴懲此時除按額捆足不令以滷耗短斤外實  
無儀所透漏之私至船戶包外之夾帶本屬慣技  
但近來外江內河層層稽核如桐城之鄉紳劉姓  
勾通船戶軍犯賣私銅陵之署縣門丁賄縱船戶  
地棍售私均經弟特參革審擬以軍徒分別從重  
發新疆爲奴餘如彭澤望江等縣船戶售私地棍  
接應搶奪及捏報淹消各案均經節次嚴拏按律

懲辦在案前弊已十去八九如果到岸猶有帶私之船查出似應據實懲辦使奸頑船戶知儆商人正切感戴倘能就案懲辦不至牽連因客累主豈有反形護庇之理至於淹消盜賣地方官延閣商人不催正其苦情難訴似未便指爲通同之據蓋其自遞報呈由勘驗以迄結案需費已不可勝筭幸而詳結何敢再事呈瀆取累故不顧已破之甑忍氣吞聲補運了事其補運雖免錢糧而每千引錢糧正雜祇三四千金其鹽本運腳實需七八千金再加淹消辦案之費已幾虧萬金之本若謂商

人以此通同船戶冀圖便宜竊恐愚不至此若商  
廝之不溺斃引目之不漂失是則定例商廝專護  
引目故一遇危險卽負引而逃然而時有淹斃商  
廝漂失引目詳咨大部之事總之商人積習浮澆  
各懷私臆而不顧大局第常所諄飭深堪痛恨若  
本無其事而地方以疑似目爲積弊多所擾累恐  
弊未除而節外之弊又生卽如船戶夾帶淹消等  
案何難卽時辦結立卽懲創乃往往有延閣一二  
年而始通詳者是何居心難逃洞鑒恐亦將有迫  
於不得不特參查辦之處至於減價敵私最爲上

策無如有課之官引總不能抵無課之私鹽而商人成本固重尤莫重於黑費既不肯開出亦難於查辦卽如漢口呈出之岸帳卽成本之一端也弟處別無確切底帳無以應命其漢岸所呈底帳亦恐未盡確切應聽尊處查辦又來示謂該商等自取消亡官亦無如之何竊謂商之消亡不足惜而國家財賦重件究未可坐聽消亡弊在商則應懲商弊在官則應懲官庶幾稍資整頓藉圖後效伏惟大公祖大人公忠體

國目覩商疲運困與公私支絀之情形自必仰叨鼎

力維持其切同舟之誼也至若鄰私之堵緝章程  
固已周備而文武之能否實力遵奉要仗威令風  
行更不僅第一已感戴之私矣

覆兩湖訥制軍書

前接手書久稽肅復想必訝其疎懶也其時適得  
鹽道書與詳件專以取結爲事似於截止浮費取  
其貌而遺其神轉爲將來不可解之弊且於題外  
牽及夾私各說似乎浮費一節專爲買靜圖安挾  
制取利之具而非爲防弊起見非下愚所敢預聞  
矣是以當經駁還意欲俟該道覆到始敢奉達以  
免歧誤也茲復奉詢及而該道亦有書來催竊謂  
此件本應歸尊處查辦第處仍係前說但得垂儆  
將來則已往可不必究若但以辯論爲事則除弊

而轉以錮弊卽弟以前亦何必多此一奏哉淮隄之弊極矣弟才力旣不能勝而近又多病默數此間困敝之區惟大公祖大人能振興之計台星移照在指顧間是此番之整頓仍長者之自爲豫畫也餘詳前箋草草手覆不一

再覆兩湖訥制軍書

高郵舟次恩恩泐覆一函隨又接奉手書當此修復隄垸之際適值連年澇歉想見綢繆慮切益徵保障功崇曷勝佩頌弟駐浦兩月正值河漕兩帥同時更易一切面爲商推今甫旋抵省垣簿書塵積兼之秋冬以來陰雨連綿加以風雷霜雪致災荒成於已報秋成之後閭閻窮窘之狀在在堪憂現與少穆中丞迫切上

聞趕緊請緩勸捐心力交瘁漕船買帶蘆鹽一事實礙江廣銷數緣近年民困已甚日食不飽力難計及



鹽味已覺食之者寡若再任私鹽占據必致銷路更滯不得不設法整理弟於兩次具陳後卽一面遴委道將於邳宿一帶堵截幸漕幫已知續奉

嚴旨皆靜聽按起蒙閣下照案派委文武按拏實感同心之助漕私既絕楚岸銷數當可望暢仰藉尊威再飭鹽道督率文武嚴堵川潞各路俾鄰私更絕銷數自益加旺矣再者辛卯岸費一事承示核帳查訊已撤運司飭令揚商登覆弟處亦照大咨轉行此事上年提揚訊明其帳內所開實因官費居多攸關體制弟是以請歸冰案辦理嗣奉台函復

經縷達但能截止自可寬其已往弟意不過如此  
否則帳本業已提揚弟又何必轉送楚省乎惟此  
事雖不能不以商爲解若使揚商畏累而全反其  
說竟似弟前

奏爲妄則弟又安能當此且浮費亦更無截止之日  
現查岸商供內卽有辛工火食等項不在四錢內  
並隨時開銷無一定款目之語實屬豫留地步不  
但不能禁止於將來且恐從此更滋流弊於閣下  
一番整頓之意豈不相左竊謂此事本在台駕未  
蒞任以前現在各商既供未奉減定章程以前係

照舊帳支用儘可照此結案揚商亦斷不能有異  
詞至於以後之事應卽如來示所云該商等恪守  
減定章程核實支銷其在官員役責成鹽道督飭  
所屬層層稽察嚴行約束倘有不遵隨時嚴辦此  
時毋庸多立科條徒滋案牘尊見如此實爲至精  
至當無可再參末議卽請台端照此奏結實爲佩  
切

覆兩廣盧制軍書

再承手示鹽件具仰老前輩大人精心籌度一秉  
虛公雅度搗謙情詞藹溢侍伏查西粵兩省向來  
每有爭界之事往往各持一說迄無定論蓋緣公  
私之見未明是以畛域之分各執此時淮鹽已萬  
分疲敝竭蹶莫支而粵鹽聞亦有爲難之處侍忝  
附後塵尤宜仰體大公無我之盛懷相與有成斷  
不敢固執已見囿於一偏而不顧全局也惟查淮  
鹽行銷六省粵鹽行銷七省而粵引八十餘萬不  
及兩淮引額之半課額則僅抵兩淮六分之一以

故淮鹽價貴粵鹽價賤而粵引既少故私鹽亦獨多百姓之食私非樂於食私故與官鬻也無非樂於食賤而已其勢衆其情順是以兩省常有粵鹽衝淮之事絕未聞有淮鹽衝粵之說淮鹽之不足以敵粵也久矣而地勢更足以擠之淮鹽由海濱場竈逆流牽挽以抵江西湖廣人力多公費亦多故成本尤重其勢不足以遠而粵鹽居高臨下一入湖南江西地界旣乘流破浪有莫遏之勢兼以叢山曠野處處可通欲徧地設卡則費用無出欲撤卡退居則放虎出山從何鉗制此淮卡之不

得不擇取要隘以進步爲退步之守也當

國初康熙年間改吉安行淮鹽減南雄路一萬四千  
三百引除其課而贛州亦由廣鹽改食潮鹽原以  
下游被侵而贛州距潮較近取其便民兼以防私  
也贛距淮遠所防之私慮其侵淮亦慮其混粵也  
凡官鹽無不有私而梟販則外來之私往者湖廣  
鹽船紛紛夾私害公賴老前輩大人設法整頓嚴  
查夾帶官引立見暢銷至今奉爲楷法其粵省熬  
鍋充斥湖南各境者亦經威令嚴查見於章奏藉  
資鍼砭此因水路較順故商私易帶不得不嚴至

於江運口岸則商運到省卽改從水販運往不干  
商人之事如吉安等府則灘高水陡贛私充占故  
水販裹足不前又非如商運口岸可以按引責成  
不得不堵緝私鹽以爲販路之導也通計贛引不  
多而一隅之地又在行鹽邊界何須設立多店且  
熬鍋至七百餘口皆以融銷不能定額爲名夫鍋  
店不設於腹內而設於臨邊之界融引不銷於他  
境而獨銷於臨界之邊謂非以鄰爲壑將歸於何  
處耶粵商各守各界之說歷來執爲談柄其實粵  
商力餘於界故名雖言界而意不在界轉以守界

爲暗銷之捷徑西鹽無界可守故以守爲界而亦  
無處非界不得不以擇隘爲禦患之重門然則粵  
商所謂直擣腹心者淮不挾私而來雖直擣何慮  
粵私如不自緝則此無數之熬鍋所出徒有損於  
淮而無益於粵亦正宜互相稽察以期裕課而安  
民也伏惟老前輩大人鑑空衡平慮周遠邇凡此  
台星之四照無非愷澤之旁敷如尊函所指粵鹽  
過關毋須點驗謹已聞命泥灣設卡粵商既多不  
願亦當另擇巡區至於五店裁三之議地圖既經  
咨達大部似應候部覆到日核遵其熬鍋之數再



陶文毅公全集

卷四十一

文集

三

三斟酌非有定數不可前經司道議留十鍋似已  
敷用仰煩查照如能俯允施行一勞永逸庶可省  
往來公牘之煩也

致江西廉訪陳蓮士書

承示文恭公奏藁翻閱一遍具見當日實心實力  
爲

國爲民事事從根本做起而運以真氣肫肫懇懇不  
競不綵以視陸宣公蘇長公一輩人時地不同而  
心印則同卽宜付刻以垂範有位切不可刪亦不  
可更易字句竊見鈔本上有將前後字句移換以  
就今式者殊屬冒昧此所謂當時體也且曾經進  
呈人

覽安可妄改乎至全集之件理宜廣收不可遺落與選本

不同況

奏件攸關時政即可徵爲年譜古人集中莫不如此  
韓歐蘇諸公集見在其中無關緊要者多矣何曾  
刪去一篇竊謂此冊籤子上有寫擬刪二字者皆  
未免拘墟切不可從必須全刻卽閣下從前刪去  
之件亦恐未的總以多收入集爲是如有以意選  
採者聽之後人可也僕於文恭平生所景仰嚮慕  
欲從末由者讀此實不勝心悅誠服之至謹當盥  
手敬識俾得附名卷末第請

觀在卽一切悉照所有原本未敢久留茲因方太守回

饒之便先託齋還俟鄙冗稍抽卽當製序奉正也

覆黃楚橋書

接來書及麓山寺碑雙鉤本具見好古佳致芝楣  
方伯處兩本俱好其一本無冊面者尤佳惜脫字  
甚多不甚完全僕所藏有一本最好在方伯二  
本之上又舊藏陳恪勤公一本孫平叔白小山何  
仙槎諸公會賞之各有跋然其中多有剪補及俗  
手填壞之字只可節取又一本係泐損之字然形  
質宛然可備參考今並送覽擇其善者從之可也  
此碑現在岳麓書院之旁僕嘗在其下摩挲觀玩  
頗能識其真贋前此閣下攜示之本乃摹刻之俗

本不但神韻迴殊而且字畫多舛與孔谷園所刻  
皆贗作也其中如蓮花禪師或作慧性禪師今各  
本俱在細觀實不相肖蓮花之與慧性均屬妄揣  
又如有霑大根霑字下截碑文早泐爲霑爲霑均  
難懸揣此類皆不如闕疑爲妥也此等苦無古本  
可校文苑英華未載此篇若全唐文則荒謬尤甚  
竟訛錯十餘字如開皇九年亦訛爲開元其可笑  
尤甚也茲閱來本極費匠心而僕意尙有未愜者  
北海書如俊鷹如利劍從無一笨滯之筆尤能化  
板爲活一切貌爲古拙或平板如筭子者皆其所

絕無而痛除者也此碑因模糊已久屢爲無知俗子用刀鑿鑿以致間有板拙之筆不可因其僞而成誤也僕以事冗不能逐一細校所望細心審爲之斯文幸甚將來刻成後如果佳善必當不逕而走不患洛陽之紙不貴也若如外間所鑄俗本則又不必多卻一番舉動矣此事洵非老手不辦相距稍遠倘有疑難方伯處當可商榷耳

此碑之陰有贊十餘段均係北海所書其上計于京不偶茲會之贊係刻於碑側頗有搨者其碑陰有甄石圍之故搨者絕少僕處尙有其文爲友人

陶文毅公全集

卷四十一

文集

望

胡墨莊持去容寫信回長沙覓到後與英英披雲  
一段同刻此時切勿上石也